

國家圖書館藏歷史檔案文獻叢刊

清季華工檔案

第 2 冊

全國圖書館文獻縮微複製中心

國家圖書館藏歷史檔案文獻叢刊

清季華工檔案

第 2 冊

全國圖書館文獻縮微複製中心

秘魯國招工案

二月初十日南洋通商大臣張樹聲函稱頃據上海沈道稟據陳丕福勳稟稱秘魯國公使格爾西亞乘坐輪船並帶兵船一隻已抵香港將先往日本即來中國並錄送近日新聞紙兩條請即密陳尊處酌奪示遵等情查秘魯國久有來中國立約並辦理招工章程之意現核新聞紙第二條足見該使先到日本亦係議約其日本扣留拐人船隻之案藉此順便一詢亦未可知但日本辦理此案實由

英美兩國官員相助該使即便詢及似
亦不難了結况該使船僅兩隻亦未必
即與日本為難至中國因日本已將此
案斷結自應將難民帶回且中國與秘
魯本無和約即招玉尚不准行况係在
澳門私裝華民出洋是彼即來饒舌我
固詞直理順不患無以應之惟該使果
來立約似難峻拒或可就此妥定章程
以免日後再有誘拐情事刻下該使尚

未到日本而新聞紙已有美使代辦條約業
經議妥僅有數條須俟該使親到再定等語
將來該使到中國議約似駐京美使亦或可
為介紹沈道所稟請由尊處向美使探詢情
形預籌辦法似非無見除已函囑沈道密向
駐滬美領探訪外茲將原稟並所送新聞紙
一併寄呈鈞覽并希迅賜示復以便遵辦是
所敬禱再本年正月二十六日恭逢

皇上親政之期是日法國無船在滬所有英美兩國

在滬兵船均經升旗鼓吹申賀沈道已函致
兩國領事道謝茲據該道稟請函達尊處可
否於晤兩國公使之時亦為致謝以示榮寵
等情合併肅布請即裁酌施行

照錄清摺

蘇松太道沈秉成稟

敬稟者竊據陳丞福勲稟稱秘魯國公使
格爾西亞乘輪船一隻並帶鉄甲兵船
一隻已抵香港俟修船完竣即往日本

現在英國有極大兵船名鉄公法國亦有兵船多隻聚泊日本難保非日本與英法商謀為有備無患之計秘使到日本後即來中國據英副領事呵喳哩云秘使來華恐費唇舌上海似宜亦為之備等語轉稟前來

職道

伏查同治九年

八月間曾奉行准總理衙門咨秘魯凌虐華工照准美使覆稱勞大臣傳知駐秘美使轉達該國寬待華工秘國欲派

員入華議約以通和好辦理招工章程等因是秘國久有派使入華議約之意至上年嗎也西船私拐華人出洋由日本截留斷結後陳丞始往帶回且中國不准華人前往無約之國承平美使早經轉達秘國有案日本將私拐華民截留交華官帶回事無不合秘使斷不能藉端生衅若向中國理論自當正言與之剖辨倘求請立約則現在東西兩洋

來中國立約者不少勢難拒絕屆時必
當稟請憲台奏咨酌辦目前上海防無
可防且秘使來船僅止兩號諒不致有
用武情事正月二十二日新聞紙載
有美使代秘國與日本立約今已議妥
惟載傭人一事日本尚未答應等語謹
將正月二十一二日新聞紙兩條錄呈
鈞鑒惟秘使既有來中國議約之說將
來自必亦由美使代為辦理可否先由

總理衙門向美國公使探詢情形酌定
辦法密為指示以備秘使到滬面商得
有遵循之處理合馳稟仰祈俯賜密致
總理衙門酌奪示遵實為公便

計呈清摺一扣

照錄正月二十一二十二日繙譯新

聞紙

二十一日

比魯國咕哩船之案現閱日本新報內載

有比魯洋去年十一月十二日一信云
此案朝廷已設法派全權大臣前往日
本理論並赴中國准於是月十八日動
身該大臣名格爾西亞係前比魯派往
合衆國公使之胞弟也朝廷囑其至日
本務請日本將此案如何辦理之處詳
細說明並請賠補該咕哩船喫虧之款
聞該大臣要乘一堅固鉄甲兵船配重
砲十六尊其船係一千八百六十五年

在英國提密士河造的本館不知日本
水師能否抵敵惟望比魯使臣善為調
停能不用武使兩國和好更妙特惠日
本不肯認錯耳

二十二日

橫濱新報云比魯與日本之事可以了結
緣美國駐日本公使曾代比魯與日本
議立條約今已議妥間有數款仍俟比
魯公使親到再行定奪聞比魯駐華盛頓

公使於一年前曾奉命商請美國軍機處代為料理與中國日本立約以便載中日兩國傭人前往比魯開取烏糞山美國已受所請當行文與駐日本之美國公使囑與日本酌議並囑通商之事應代為力請允准至於載傭人出洋一事亦應代為提及惟不可勉強等語今比魯派公使至日本之舉係早已知會日本非麻里亞魯士船案之後方有是

事明矣乃各處風謠殊出意外查麻里亞船案一事因各館新報紛紛議論是以引動比魯人心但遣使一事寔係一年前之舉非為船案起見因後來有此等事國主自應着該公使便中理楚各處新報何必藉此生謠刻下本館明知兩國事務業已議妥惟載傭人一事日本尚未答應謂日本並無游民可以出洋倘有游民情願令其至比魯不欲其

至西班牙國受苦云云

謹再稟者正月二十六日恭逢

皇上親政之期是日英美兩國在滬兵船俱

升旗鼓吹申賀

職道

業經函致英美領

事道謝如總理衙門晤英美公使時可

否亦致謝意以示寵榮至法國是日並

無兵船在滬無須言謝合併稟請緘致

總理衙門裁酌辦理云云